



Komunikadu Imprensa
Tribunál Judisiál Primeira Instánsia Dili
18 Dezembru 2024

Autór judisiáriu Tribunál Dili aseita atu aplika pena traballu a favor ba comunidade iha kazu violénsia doméstika maibé rekere lejislasaun komplementár atu aseguira kolaborasaun serbisu ho MSSI no Ministériu Públiku iha implementasaun

Iha diskusaun ho autór judisiáriu Tribunál Judisiál Primeira Instánsia Dili ho tema Konsolidasaun Esforsu atu Prevene Violénsia Bazeia ba Jéneru (VBJ) liuhosi Desizaun Judisiál ne'ebé organiza hosi JSMP iha 13 Dezembru 2024, iha Ótel Novo Turismo, juis sira espresa sira nia protindaun atu aplika pena traballu a favor ba comunidade iha kazu violénsia doméstika, importante mak tenke iha lejislasaun komplementár atu aseguira kolaborasaun ho Ministériu Solidaridade Sosiál no Inkluzsaun (MSSI) inklui Ministériu Públiku tanba sira mak sei promove no sei halo serbisu ba re-insersaun sosiál no nu'udar ezekutór ba desizaun tribunál.

Diskusaun ne'e ho objetivu atu apresenta rezultadu monitorizasaun JSMP nian iha Tribunál Judisiál Primeira Instánsia sira relasiona ho tendénsia desizaun sira iha tribunál ba kazu sira ho natureza VBJ. Partikularmente ba desizaun kazu violénsia doméstika ne'ebé okupa fatin aas iha tribunál sira hotu no diskusaun ne'e foka liu ba pena sira ne'ebé tribunál aplika maibé la hatudu efeitu disuasivu ka efeitu hata'uk atu refléta ba objetivu pena ka sentensa ne'ebé hatur iha Kódigu Penál.

“JSMP fiar katak ho esforsu liuhosi konsolidasaun no diskusaun aberta, partilla no arminiza perspectiva no estratéjia iha forum hirak ne'ebé realiza iha forma ida informal no amigavel, bele hametin liután komitmentu autór tribunál sira atu esplora no desenvolve modalidade pena sira iha Kódigu Penál no aseguira nia efeitu ba prevensaun”, dehan Sra. Ana Paula Marçal, Diretora Ezekutiva JSMP.

Iha diskusaun ne'e, JSMP apresenta estatística desizaun sira ne'ebé normalmente tribunál aplika iha kazu VBJ maibé laiha efeitu disuasivu/efeitu hata'uk ema. Tanba ne'e, depois avalia no ezamina modalidade pena ne'ebé KP estabelese, JSMP propoin ba tribunál atu explora pena traballu a favor ba comunidade sai hanesan pena alternativa.

Alende asuntu kona-ba pena traballu a favor ba comunidade, JSMP mós apresenta rezultadu survey JSMP nian kona-ba persepsaun no satisfasaun hosi interveniente sira (ofendida, testemuña no arguidu) relasiona ho sistema serbisu atendimento no funsionamentu setór justisa nian no esforsu sira hosi grupu traballu kona-ba política kriminál ba alterasaun Kódigu Penál (KP) no Lei Kontra Violénsia Doméstika (LKVD) atu inkorpora kazu inestu nu'udar krime ho artigu espesífiku iha KP no inkorpora krime relevante seluk ne'ebé seidak inklui iha LKVD atu konsidera hanesan krime públiku.

Durante diskusaun, juis na'in rua, Dr. Afonso Carmona no Dr. Ivan P. A. Gonçalves ne'ebé marka prezensa reflète sira nia esforsu sira no esperiénsia durante julga kazu VBJ, liuliu iha kazu violénsia doméstika. Dr. Carmona iha nia intervensaun haktuir katak nia konkorda ho JSMP nia hanoin kona-ba dezenvolve pena traballu afavor ba comunidade sai pena alternativa kuandu aplikasaun pena seluk laiha efeitu. Maibé nia sujere atu avalia sirkunstánsia sira relasiona ho desizaun ne'e, tanba la'os ema hotu tenke ba iha prizaun. Nia hatutan katak desizaun ba kazu violénsia doméstika tenke hahú hosi pena multa mak bele sae ba pena bo'ot sira no tenke bazeia mós ba sira nia aktu pratikadu sira.

Relasiona kona-ba polítika ba alterasaun Kódigu Penál, Dr. Ivan P. A. Gonçalves iha ninia intervensaun konkorda atu bele iha provizaun spesífiku ba kazu incestu, tanba iha kontestu Timor, mezmuke iha konsentimentu, hanesan aman no oan, maun no feton hosi aspetu saida deit la iha fatin atu permite ida ne'e akontese, tanba ne'e prezisa duni iha artigu spesífiku kona-ba krime incestu.

JSMP fiar katak ho diskusaun no apresentasaun dadus real hirak ne'e sei fasilita tribunál atu explora pena serbisu afavor ba comunidade sai hanesan pena alternativa atu aplika iha kazu violénsia doméstika sira tanba pena hirak ne'ebé durante ne'e tribunál aplika la prodús efeitu disuasivu ba kondenadu no comunidade.

Diskusaun ne'e partisipa hosi Juis, advogadu privadu, SEI, VPU nasional, VPU Munisípiu Dili, TAF, ALFeLa, Pradet, Fokupers, CFJJ.

Atividade ne'e realiza ho apoiu hosi TAF – Nabilan.

Atu hetan informasaun kompletu favor kontaktu:

Ana Paula Marçal
Diretora Ezekutiva JSMP
Email: ana@jsmp.tl
Telefóne: 332388377040735
Website: <http://jsmp.tl>